

王勃詩全集

王勃

版权信息

书名:王勃诗全集

作者:王勃

中信出版集团制作发行

版权所有•侵权必究

圣泉宴

披襟乘石蹬，列籍俯春泉。

兰气熏山酌，松声韵野弦。

影飘垂叶外，香度落花前。

兴洽林塘晚，重岩起夕烟。

寻道观 其观即昌利观，张天师居也。

芝应光分野，蓬阙盛规模。

碧坛清桂阙，丹洞肃松枢。

玉笈三山记，金箱五岳图。

苍虬不可得，空望白云衢。

散关晨度

关山凌旦开，石路无尘埃。

白马高谭去，青牛真气来。

重门临巨壑，连栋想崇隈。

即今扬策度，非是弃繻回。

游梵宇三觉寺

香阁披青磴，雕台控紫岑。

叶齐山径密，花积野坛深。

萝幌栖禅影，松门听梵音。

遽忻陪妙躅，延赏涤烦襟。

别薛华 <英华>作秋日别薛升华

送送多穷路，遑遑独问津。

悲凉千里道，凄断百年身。

心事同漂泊，生涯共苦辛。

无论去与住，俱是梦中人。

重别薛华 一作重别薛升华

明月沉珠浦，凤飘濯锦川。

楼台临绝岸，洲渚亘长天。

飘泊成千里，栖遑共百年。

穷途唯有泪，远望独潸然。

麻平晚行

百年怀土望，千里倦游情。

高低寻戍道，远近听泉声。

涧叶才分色，山花不辨名。

羈心何处尽，风急暮猿清。

送卢主簿

穷途非所恨，虚室自相依。

城阙居年满，琴尊俗事稀。

开襟方未已，分袂忽多违。

东岩富松竹，岁暮幸同归。

钱韦兵曹

征骖临野次，别袂惨江垂。

川霁浮烟敛，山明落照移。

鹰风凋晚叶，蝉露泣秋枝。

亭皋分远望，延想间云涯。

白下驿饯唐少府

下驿穷交日，昌亭旅食年。

相知何用早，怀抱即依然。

浦楼低晚照，乡路隔风烟。

去去如何道，长安在日边。

杜少府之任蜀州

城阙辅三秦，风烟望五津。

与君离别意，同是宦游人。

海内存知己，天涯若比邻。

无为在歧路，儿女共沾巾。

仲春郊外

东园垂柳径，西堰落花津。

物色连三月，风光绝四邻。

鸟飞村觉曙，鱼戏水知青。

初晴山院里，何处染嚣尘。

郊兴

空园歌独酌，春日赋闲居。

泽兰侵小径，河柳覆长渠。

雨去花光湿，风归叶影疏。

山人不惜醉，唯畏绿尊虚。

郊园即事

烟霞春旦赏，松竹故年心。

断山疑画障，县溜泻鸣琴。

草遍南亭合，花开北院深。

闲居饶酒赋，随兴欲抽簪。

观佛迹寺

莲座神容严，松崖圣趾馀。

年长金迹浅，地久石文疏。

颓华临曲磴。倾影覆前除。

共嗟陵谷远，俄视化城虚。

山居晚眺赠王道士

金坛疏俗宇，玉洞侣仙群。

花枝栖晚露，峰叶度晴云。

斜照移山影，回沙拥籀文。

琴尊方待兴，竹树已迎曛。

八仙径 寺南又有昌利观，去寺可数里，岩径窈窕，杖而后进。

奈园欣八正，松岩访九仙。

援萝窥雾术，攀林俯云烟。

岱北鸾骖至，辽西鹤骑旋。

终希脱尘网，连翼下芝田。

春日还郊

闲情兼嘿语，携杖赴岩泉。

草绿萦新带，榆青缀古钱。

鱼床侵岸水，鸟路入山烟。

还题平子赋，花树满春田。

对酒春园作

投簪下山阁，携酒对河梁。

狭水牵长镜，高花送断香。

繁莺歌似曲，疏蝶舞成行。

自然催一醉，非但阅年光。

观内怀仙

玉架残书隐，金坛旧迹迷。

牵花寻紫涧，步叶下清溪。

琼浆犹类乳，石髓尚如泥。

自能成羽翼，何必仰云梯。

秋日别王长史

别路馀千里，深恩重百年。

正悲西候日，更动北梁篇。

野色笼寒雾，山光敛暮烟。

终知难再奉，怀德自潸然。

上巳浮江宴韵得遥字

上巳年光促，中川兴绪遥。

绿齐山叶满，红泄片花销。

泉声喧后涧。虹影照前桥。

遽悲春望远，江路积波潮。

长柳

晨征犯烟磴，夕憩在云关。

晚风清近壑，新月照澄湾。

郊童樵唱返，津叟钓歌还。

客行无与晤，赖此释愁颜。

羈游餞別

客心悬陇路，游子倦江干。

槿丰朝砌静，条密夜窗寒。

琴声销别恨，风景驻离欢。

宁觉山川远，悠悠旅思难。

铜雀妓二首

金凤邻铜雀，漳河望邺城。

君王无处所，台榭若平生。

舞席纷何就，歌梁俨未倾。

西陵松檟冷，谁见绮罗情。

铜雀妓二首

妾本深宫妓，层城闭九重。

君王欢爱尽。歌舞为谁容。

锦衾不复襞，罗衣谁再缝。

高台西北望，流涕向青松。

易阳早发

饬装侵晓月，奔策候残星。

危阁寻丹障，回梁属翠屏。

云间迷树影，雾里失蜂形。

复此惊飙至，空山飞夜萤。

焦岸早行和陆四

侵星违旅馆，乘月戒征俦。

复嶂迷晴色，虚岩辨暗流。

猿吟山漏晓，萤散野风秋。

故人渺何际，乡关云雾浮。

临江二首

泛泛东流水，飞飞北上尘。

归骖将别棹，俱是倦游人。

去骖嘶别路，归棹隐寒洲。

江皋木叶下，应想故城秋。

江亭夜月送别二首

江送巴南水，山横塞北云。

津亭秋月夜，谁见泣离群。

乱烟笼碧砌，飞月向南端。

寂寂离亭掩，江山此夜寒。

深湾夜宿主人依山带江

津涂临巨壑，村宇架危岑。

堰绝滩声隐，风交树影深。

江童暮理楫，山女夜调砧。

此时故乡远，宁知游子心。

伤裴录事丧子

兰阶霜候早，松露夜台深。

魄散珠胎没，芳销玉树沉。

露文晞宿草，烟照惨平林。

芝焚空叹息，流恨满厥金。

晚留一作届凤州

宝鸡辞旧役，仙凤历遗墟。

去此近城阙，青山明月初。

羈春

客心千里倦，春事一朝归。

还伤北园里，重见落花飞。

林塘怀友

芳屏画春草，仙杼织朝霞。

何如山水路，对面即飞花。

山扉夜坐

抱琴开野室，携酒对情人。

林塘花月下，别似一家春。

春庄

山中兰叶径，城外李桃园。

岂知人事静，不觉鸟声喧。

春游

客念纷无极，春泪倍成行。

今朝花树下，不觉恋年光。

春园

山泉两处晚，花柳一园春。

还持千日启醉，共作百年人。

林泉独饮

丘壑经涂赏，花柳遇时春。

相逢今不醉，物色自轻人。

登城春望

物外山川近，晴初景霭新。

芳郊花柳遍，何处不宜春。

他乡叙兴

缀叶归烟晚，乘花落照春。

边城琴酒处，俱是越乡人。

夜兴

野烟含夕渚，山月照秋林。

还将中散兴，来偶步兵琴。

早春野望

江旷春潮白，山长晓岫青。

他乡临睨极，花柳映边亭。

山中

长江悲已滞，万里念将归。

况属高风晚，山山黄叶飞。

冬郊行望

桂密岩花白，梨疏林叶红。

江皋寒望尽，归念断征篷。

始平晚

观阙长安近，江山蜀路赊。

客行朝复夕，无处是乡家。

扶风昼屈离京浸远

帝里金茎去，扶风石柱来。

山川殊未已，行路方悠哉。

普安建阴题壁

江汉深无极，梁岷不可攀。

山川云雾里，游子几时还。

九日

九日重阳节，开门有菊花。

不知来送酒，若个是陶家。

秋江送别二首

早是他乡值早秋，江亭明月带江流。

已觉逝川伤别念，复看津树隐离舟。

归舟归骑俨成行，江南江北互相望。

谁谓波澜才一水，已觉山川是两乡。

寒夜怀友杂体二首

北山烟雾始茫茫，南津霜月正苍苍。

秋深客思纷无已，复值征鸿中夜起。

复阁重楼向浦开，秋风明月度江来。

故人故情怀故宴，相望相思不相见。

蜀中九日 《纪事》作和邵大震，一作蜀中九日登
玄武山旅眺。

九月九日望乡台，他席他乡送客杯。

人情已厌南中苦，鸿雁那从北地来。

河阳桥代窈郎中佳人答杨中舍

披风听鸟长河路，临津织女遥相妒。

判知秋夕带啼还，那及春朝携手度。

九日怀封元寂

九月郊原望，平野遍霜威。

兰气添新酌，花香染别衣。

九秋良会少，千里故人稀。

今日龙山外，当忆雁书旧。

杂曲

智琼神女，来访文君。

蛾眉始约，罗袖初薰。

歌齐曲韵，舞乱行纷。

若向阳台荐枕，何啻得胜朝云。

上巳浮江宴韵得址字

披观玉京路，驻赏金台址。

逸兴怀九仙，良辰倾四美。

松吟白云际，佳馥青溪里。

别有江海心，月暮情何已。

春日宴乐游园赋韵得接字

帝里寒光尽，神皋春望浹。

梅郊落晚英，柳甸惊初叶。

流水抽奇弄，崩云洒芳牒。

清尊湛不空，暂喜平生接。

山亭夜宴

桂宇幽襟积，山亭惊夜永。

森沉野径寒，肃穆岩扉静。

竹晦南阿色，荷翻北潭影。

清兴殊未阑，林端照初景。

咏风

肃肃凉风生，加我林壑清。

驱烟寻涧户，卷雾出山楹。

去来固无迹，动息如有情。

日落山水静，为君起松声。

滕王阁

滕王高阁临江渚，珮玉鸣鸾罢歌舞。

书栋朝飞南浦云，珠帘暮卷西山雨。

闲云潭影日悠悠，物换星移几度秋。

阁中帝子今何在，槛外长江空自流。

江南弄

江南弄，巫山连楚梦，行雨行云几相送。

瑶轩金谷上春时，玉童仙女无见期。

紫雾香烟渺难托，清风明月遥相思。

遥相思，草徒绿，为听双飞凤凰曲。

落花落以下诗集不载

落花落，落花纷漠漠。

绿叶青跗映丹萼，与君裴回上金阁。

影拂妆阶玳瑁筵，香飘舞馆茱萸幕。落花飞，燎乱入中帷。

落花春正满，春人归不归。

落花度，氛氲绕高树。

落花春已繁，春人春不顾。

绮阁青台静且闲，罗袂红巾复往还。

盛年不再得，高枝难重攀。试复旦游落花里，

暮宿落花间。与君落花院，台上起双环。

秋夜长

秋夜长，殊未央，月明白露澄清光，层城绮阁遥相望。

遥相望，川无梁，北风受节南雁翔，崇兰委质时菊芳。鸣环曳履出长廊，为君秋夜捣衣裳。

纤罗对凤皇，丹绮双鸳鸯，调砧乱杵思自伤。

思自伤，征夫万里戍他乡。

鹤关音信断，龙门道路长。君在天一方，寒衣徒自香。

泥溪

弭棹凌奔壑，低鞭蹶峻岐。

江涛出岸险，峰磴入云危。

溜急船文乱，岩斜骑影移。

水烟笼翠渚，山照落丹崖。

风生蘋浦叶，露泣竹潭枝。

泛水虽云美，劳歌谁复知。

秋日仙游观赠道士 一作骆宾王诗，无首四句

石图分帝宇，银牒洞灵宫。

回丹紫岫室，复翠上岩栊。

雾浓金灶静，云暗玉坛空。

野花常捧露，山叶自吟风。

林泉朋月在，诗酒故人同。

待余逢石髓。从尔命飞鸿。

出坑游山二首 本作题玄武山道君庙

源水终无路，山阿若有人。

驱羊先动石，走兔欲投巾。

洞晚秋泉冷，岩朝古树新。

峰斜连鸟翅，磴叠上鱼鳞。

化鹤千龄早，元龟六代春。

俘云今可驾，沧海自成尘。

出坑游山二首

振翻棱霜吹，正月仁天浔。

回镰凌翠壑，飞轸控青岑。

岩深灵灶没，涧毁石渠沉。

宫阙云间近，江山物外临。

玉坛栖暮夜，珠洞结秋阴。

萧萧寓俗影，扰扰望乡心。

谁意山游好，屡伤人事侵。

别人四首

久客逢馀闰，他乡别故人。

自然堪下泪，谁忍望征尘。

江上风烟积，山幽云雾多。

送君南浦外，还望将如何。

桂轺虽不驻，兰筵幸未开。

林塘风月赏，还待敌人来。

霸华净天末，雾色笼江际。

客子常畏人，何为久留滞。

赠李十四四首

野客思茅宇，山人爱竹林。

琴尊唯待处，风月自相寻。

小径偏宜草，空庭不厌花。

平生诗与酒，自得会仙家。

乱竹开三径，飞花满四邻。

从来扬子宅，别有尚玄人。

风筵调桂轸，月径引藤杯。

直当花院里，书斋望晓开。

怀仙并序

客有自幽山来者，起予以林壑之事，而烟霞在焉。

思解纓绂、永咏山水。

神与道超，迹为形滞。故书其事焉。

鹤岑有奇径，麟洲富仙家。

紫泉漱珠液，玄岩列丹葩。

常希披尘网，眇然登云车。

鸾情极霄汉。凤想疲烟霞。

道存蓬瀛近，意惬朝市赊。

无为坐惆怅，虚此江上华。

忽梦游仙

仆本江上客，牵迹在方内。

寤寐霄汉间，居然有灵对。

翕尔登霞首，依然蹑云背。

电策驱龙光，烟途俨鸾态。

乘月披金帔，连星解琼珮。

浮识俄易归，真游邈难再。

寥廓沉遐想、周遑奉遗海。

流俗非我乡，何当释尘昧。

三月曲水宴得烟字

彭泽官初去，河阳赋始传。

田园归旧国，诗酒间长筵。

列室窥丹洞，分楼瞰紫烟。

索回亘津渡，出没控郊邵。

风琴调上客，龙辔俨群仙。

松石偏宜古。藤萝不记年。

重檐交密树，复磴拥危泉。

抗石睎南岭，乘沙眇北川。

傅岩来筑处，蹊溪人钩前。

日斜真趣远，幽思梦凉蝉。

寒夜思友三首

久别侵怀抱，他乡变容色。

月下调鸣琴，相思此何极。

云间征思断，月下归愁切。

鸿雁西葡飞，如何故人别。

朝朝翠山下，夜夜苍江曲。

复此遥相思。清尊湛芳绿。

采莲曲 乐府作采莲归

采莲归，绿水芙蓉衣。秋风起浪凫雁飞。

桂棹兰桡下长浦，罗裙玉腕轻摇橹。

叶屿花潭极望平，江讴越吹相思苦。

相思苦，佳期不可驻。

塞外征夫犹未还，江南采莲今已暮。

今已暮，采莲花。渠今那必尽娼家。

官道城南把桑叶，何如江上采莲花。

莲花复莲花，花叶何重叠。

叶翠本羞眉，花红强如颊。

佳人不在兹，怅望别离时。

牵花怜共蒂，折藕爱连丝。

故情无处所，新物从华滋。

不借西津交佩解，还羞北海雁书迟。

采莲歌有节，采莲夜未歇。

正逢浩荡江上风，又值裴回江上月。

裴回莲浦夜相逢，吴姬越女何丰茸。

共问寒江千里外，征客关山更几重。

临高台

临高台，高台迢递绝浮埃。

瑶轩绮构何崔嵬，鸾歌风吹清且哀。

俯瞰长安道，萋萋御沟草。

斜对甘泉路，苍苍茂陵树。

高台四望同，帝乡佳气郁葱葱。

紫阁丹楼纷照耀，壁房锦殿相玲珑。

东弥长乐观，西指未央宫。

赤城映朝日，绿树摇春风。

旗亭百隧开新市，甲第千甍亮分戚里。

朱轮翠盖不胜春。叠榭层楹相对起。

复有青楼大道中，绣户文窗雕绮栊。

锦衾夜不襞，罗帷昼未空。

歌屏朝掩翠，妆镜晚窥红。

为君安宝髻，蛾眉罢花丛。

尘间狭路黯将暮，云间月色明如素。

鸳鸯池上两两飞，凤凰楼下双双度。

物色正如此，佳期那不顾。

银鞍绣毂盛繁华，可怜今夜宿娼家。

娼家少妇不须颦，东园桃李片时春。

君看旧日高台处，柏梁铜雀生黄尘。